

Newspaper	Suara Keadilan
Date	26/4/2013

Najib pindah wang 1MDB RM7b ke akaun sulit luar negara

Suara Keadilan - 26/4/2013

Oleh AISYA GEOFFREY

KEADILAN mendedahkan badan pelaburan kerajaan, 1Malaysia Development Berhad (1MDB) yang dikawal sepenuhnya Datuk Seri Najib Razak memindahkan RM7 bilion dana ke akaun sulit di pusat kewangan pesisir pantai, Cayman Island.

Pengarah Strateginya, Rafizi Ramli berkata pindahan itu dinyatakan dalam laporan tahunan 1MDB dan turut dibangkitkan dalam laporan majalah ekonomi, The Edge.

Katanya, akaun sulit itu hanya digunakan bagi urusan yang dirahsiakan dan ia dilindungi undang-undang untuk urusan yang berunsur jenayah atau ra-

suah.

"Kita mempersoal kewajaran sebuah badan pelaburan milik negara memindahkan RM7 bilion ke dalam akaun rahsia di pusat kewangan seperti Cayman Island," kata Rafizi dalam sidang media 23 April lalu.

1MDB mendapat modal melalui terbitan bon sebanyak RM5 bilion yang dijamin oleh kerajaan. Dari modal itu, ia melabur melalui beberapa pelaburan di luar negara terutama dalam Petro Saudi International (PSI) yang diragui kewujudan dan aktiviti.

"Dari urusan dengan PSI yang penuh kerahsiaan inilah, sejumlah RM7 bilion dilaporkan dipindahkan ke akaun rahsia di Cayman Island," katanya.



Tegasnya, Najib perlu menjawab segera isu pemindahan wang tersebut kerana ia berten-

tangan dengan prinsip ketelusan yang sepatutnya diamalkan badan pelaburan kerajaan.

"Saya khawatir sekiranya BN kalah dalam PRU-13, wang RM7 bilion itu tidak dapat dijejaki dan hilang begitu saja, kerajaan (baru) akan terpaksa menanggung kerugian besar," jelasnya.

Sehubungan itu, Rafizi akan membuat laporan kepada Bank Negara Malaysia (BNM), polis dan Suruhanjaya Pencegahan Rasuah Malaysia (SPRM) supaya wang itu dibawa balik ke Malaysia secepat mungkin.

"Ia bagi membolehkan satu siasatan dimulakan serta merata sebaik Pakatan Rakyat mengambil alih kuasa. Mereka yang bertanggungjawab memindahkan wang itu akan dihadapkan ke muka pengadilan," tegasnya.